

Aajerwets Spätsjoppe beej Coëba



Vastelaovend in Tegele begint op vastelaoveszóndig ouch dit jaor met 't Aajerwets Spätsjoppe beej Coëba.

De belangsjtelling vur 't vastelaovesmatinee is de aafgeloupe jaore zoé gesjtege, det 't zaelke wuürt oétgebrijd met 'n tent en 'n extra tappunt. Door de oébtaters van kefee Schillings, in Tegele baeter bekind as 'Beej Coëba', wuürt in samewerking met de Alfa Fanclub en vastelaovesgezelsjap De Beerpiëp wir 'n program aangebaoje wao-mei de organisatore de vastelaovend van vruúger wille laote herlaeve.

Lekker gemütlich spätsjoppe wies laat in de middig en vruúge aovend, met meziek vur alle laeftiéde en ouch 't nuédige kulinaire genot. Boéte in de tent achter 't zaelke wuürt in de Sjinkebar lekkere vastelaoves-bik klaor gemak, zoe-wie kerboét, ertesoeep en currywors.

Beej de Beerpiëp-residensie aan de Keuningsjtraot is 't dus wir te doen op vastelaoveszóndig. D'r is gezellige meziek wao-beej geklasjeneerd ken waere, aafgewisseld met optraejes van ónger mier Duo Dance, Thei & Marij, Clement & Joyce, Sandra & Marco en de Partymakers Tropicano.

Ut zevende Spätsjoppe begint um 13.11 oor, de toegang is gratis. Daags d'r veur is d'r vanaaf 20.00 oor 'n pre-party beej Coëba met Tropicano en 't oétrope van de sjaarkasprins. De Alfaclub en de Beerpiëp zien ouch den van de partij!